

مشروع الحكايا والتاريخ الشفوي

ورشة المعارف

٢٠٢٠

الحكواتية: ج.د.

السلسلة: التجربة المكانية

التاريخ: 10/11/2020

رقم الأرشيف: 20-TMOH-003

نوع الأرشيف: إستخدام محدود

التجربة المكانية	السلسلة/الموضوع الرئيسي
20-TMOH-003	رقم الأرشيف
للاستخدام المحدود - يجب استشارة الحكواتية قبل استخدام هذه المقابلة لأي غرض ثقافي او بحث	نوع الأرشيف
ج.د.	الحكواتية
21/12/1967	تاريخ ميلاد الحكواتية
10/11/2020	تاريخ ومكان المقابلة
هذا التاريخ الشفوي هو عن الفقدان والنجاة. في أول جزء من هذه المقابلة مع ج.د، تروي نبذات من طفولتها المرححة بين الأقارب والأشجار، اللعب والضحك، وانتهاء هذه الفترة فجأة في عمر التسع سنوات حيث تعيش الحرب الأهلية اللبنانية في منطقة النبعة. تفقد ج.د. أهلها بينما تنجوا هي وأخوتها ليهربوا من النبعة بمساعدة ابن عمها الذي فقد قدمه نحو "الضيعة" حيث جدها وجدتها. تكشف المقابلة اصرارها على الحياة، حيث تتفوق في المدرسة بالرغم من تسجيلها المتأخر جراء الأحداث التي عايشتها، وتحكي قصص عن ناس أثروا بها من بائع الكعك حتى مربيته القاسية قلباً لكن المحبة قلباً.	ملخص التاريخ الشفوي
مع العديد من الأهواء والإهتمامات الشخصية التي تتمتع بها، حصلت يارا أيوب على شهادتي بكالوريوس، واحدة في الفلسفة والأخرى في التصميم الداخلي. منذ عام 2012، وهي ناشطة وعضوة في العديد من المبادرات والمنظمات غير الحكومية. شاركت في العديد من المنصات الوطنية والدولية وهي الآن المدير التنفيذي لمنظمة "من إلى" غير الحكومية.	معلومات عن الباحثة
زينب الديراني	التفريغ
سن الفيل، النبعة، الطفولة، عيلة، بولونيا، الحرب الأهلية، خسارة الأهل، خبز الصباح على السطوح، جبل، مقبرة، كنيسة مار ضومط، بيروت، فرنسا، جنينات فواكه وورود، كرز، تفاح، سفرجل، كلاب، بسيكلات، ثلج، صوبيا، كستنا، حمص، عيد الميلاد، بابانويل، حرش، صنوبر، ضفاضع، حية، مته، الجامعة الأميركية، أهل، قصف، حسينية، رصاص متفجر، تشقيرة الفرش، شارع خوري عريس، وقف إطلاق نار، مرض السكري، قناص، بيع خبز، صلح، دفن، بورة، حواجز، متحف، حمرا، بيروت الغربية والشرقية، الجنوب، القضايات، فلاحه الأرض، فدان، العمدة، جرن، الليرة الإنكليزية، مدرسة، إنكليزي، مسطرة خشب، بيدر، قمح، مدرسة الأيتام، مربية، الإجتياح، سوريا، الأنروا	الكلمات الدلالية

Rights of Ownership for the Storytelling and Oral History Project

The Knowledge Workshop holds full or co-ownership of all items that it archives and publishes. Recordings published on the Knowledge Workshop website can be used only for cultural, educational and non-profit purposes, and never for commercial purposes.

To use the material on our website, including the oral histories and their related images, we ask that you always reference the Knowledge Workshop with: Storyteller's name, interviewed by Researcher's name, Date, The Storytelling and Oral History Project, the Knowledge Workshop, Beirut, Lebanon, page number. [Ex. Nazik Saba Yared, interviewed by Deema Kaedbey, 2017, The Storytelling and Oral History Project, the Knowledge Workshop, Beirut, Lebanon, pp 12.]

To use the limited-use items held within the Knowledge Workshop, you can visit our office in Furn El Chebbak and fill out a permission form. You can use these items inside the Knowledge Workshop space, but we request that you consult with us on which items you can use. Some of these items require permission from the storytellers before being used.

حقوق ملكية لمشروع الحكايا والتاريخ الشفوي

لورشة المعارف ملكية تامة أو مشتركة للمواد التي تؤرشفها وتنشرها. التاريخ الشفوي المنشور على الصفحة الالكترونية لورشة المعارف يمكن استعمالها فقط لأهداف ثقافية وتثقيفية لا تبغى الربح، ولا يمكن استعمالها لأهداف تجارية تبغى الربح.

لاستعمال المواد على صفحتنا الالكترونية، من ضمنها التاريخ الشفوي والصور المرافقة نطلب منكم التنويه بورشة المعارف كمرجع باستعمال: اسم الحكواتية، قابلتها اسم الباحثة، السنة، مشروع الحكايا والتاريخ الشفوي، ورشة المعارف، بيروت، لبنان، الصفحة. [مثلاً: نازك سابا يارد، قابلتها ديمة قائدبيه، ٢٠١٧، مشروع الحكايا والتاريخ الشفوي، ورشة المعارف، بيروت، لبنان، ص. ١٢]

لاستعمال المواد المحددة الاستعمال الموجودة في ورشة المعارف (الغير متاحة على صفحتنا)، يمكنكم القدوم الى مكتبنا في فرن الشباك وتعبئة استمارة الطلب. بالإمكان استعمال هذه الموارد داخل ورشة المعارف، لكن نسألكم ان تستشيرونا عن أي مواد يمكن استعمالها. بعض هذه المواد تتطلب طلب من الحكواتيات قبل استعمالها.

يارا أيوب: نحن اليوم 10 تشرين الثاني 2020، الساعة 11:10، بمقابلة تاريخ شفوي نسوي لصالح ورشة المعارف، بمنطقة الحدث، مع ج.د. بتعرفينا أكثر عن حالك، أي سنة ولدت، وأي مكان؟

ج.د.: [00:00:25] مرحبا، أنا ج.د.، مواليد 1967/12/21، سن الفيل، وكنت أنا من سكان النبعة، الطفولة بالنسبة لألي كان شب كثير حلو، كنا بيت عيلة، منها كبيرة يعني، عبارة عن ماما وبابا وعندي 3 أخوة صبيان. ممم، كان حياة حلوة، صراحة، ما كان في حرب، ما كان في شي، وكنت لأنو أنا وحيدة، كنت مدللة. أكيد، هني كان في، كانوا صارمين، بس كان في مساحة من الدلال لألي. نحن كنا ساكنين بالنبعة، وتقريبا أهل العيلة أغلبهن كانوا هونيك موجودين، وكنا مش كثير بعاد بالمنطقة عن بعض يعني، إقدر روح أنا زورهن بالوقت اللي بدي ياه، إنزل، روح وإجي، وكنا نروح بالعطل يلي لأننا، نطلع عند بيت جدي ببولونيا، كمان كنا نقضي أوقات كثير حلوة، أوقات كثير ممتعة، ممم، لحين إجت الحرب، وبابا توفي بوقتها، كان مريض، وتوفي، وماما إنقتلت خلال الحرب، هون صار في مرحلة مفصلية، تغيرت الحياة اللي إلنا. بتذكر النبعة كانت حلوة، هيك كيف بدي فلك، بأهلها، بهيدي الإلفة اللي بين الناس كانت، هي منطقة شعبية، كنت حسها كثير كبيرة، ليه عم قول إنو حسها كبيرة؟، لأنو أنا بعد ما كبرت وتزوجت وسافرت ورجعت، كان عندي فضول إرجع لها المنطقة اللي أنا عشت طفولتي فيها لشوفها، شوف البيت، بيتنا اللي كنا ساكنين فيه، فأنا تفاجئت إنو لأ هي حي كثير صغير، وطريق كثير ضيق، أنا كنت شوفه كثير كبير أنا وصغيرة، كنت شقية، أحيانا يمكن تصرفاتي كانت أحيانا صبيانية، بذكر نحن كان بيتنا على الطابق الثالث، أنا كنت أوقات غافل أهلي، إطلع عالبرندا، إتعشق [تبسم] عالدرابزين، ممم، مرة من المرات كنت ح أوقع من هيدي الشقاوة مثلا، بذكر مرة مثلا جربوا، يمكن كانوا بدهن بينوا شي مبنى، أو ما بعرف شو بدهن يعملوا، فجابوا تراب، تلة هيك عالية شوي، حطوها قدام المبنى اللي إلنا، والطابق الأول، كرسة الدرج اللي بتأخذك عالطابق الأول هي مفتوحة، جاية طاقات مفتوحة، فأنا كنت كثير حب إنني إطلع عهيدي الطاقة ونط لتحت عالترايات، عالرمالات، فايه، هيدي التصرفات الصبيانية كانت عندي موجودة، يمكن بتصور كمان لأنو إخواني كانوا صبيان، ممكن هي الشغلة تكون أثرت شوي بالموضوع، كنت كثير كلوز [close] أنا وخبي اللي أصغر مني بسنة، ممم، بس دايمنا يضل في مشاكل بيناتنا، كثير منحب بعض، بس كثير كنا نضل نتخانق ك لالوقت، بذكر مرة، ما بعرف إذا هيدي التفاصيل منيحة وبتهمكن، بذكر مرة، نازلة عالدرج، عم يحكييني، ودفشني، فوقعت، no، أنا دفشته عالدرج، فهو وقع، وقع وجرح شفته، وإضطروا إنو يقطبوله، ويحطوله بلاستر [plaster]، فأنا صرت إضحك عليه إنو هو عنده شوارب، لبعده يومين، نحن رايعين عند بيت عمي، عندهن هني بوابة حديد بالمدخل، إلها حفة باطون، راح دفشني، وكمان إنجرت وحطولي لزيفة، فهو كان كثير مبسوط إنو نحن صرنا تتيناتنا مثل بعض. [00:05:25] كنت مزاجية بالأكل، إذا ما عجبني شي ماما عامليته، الكبار هني بحبوه، قلها "يلا باي"، تقلي "لوين؟"، قلها رايحة شوف -هالقد كان هيدي العلاقة الوطيدة بين الأهل- قلها رايحة شوف --إنو أنا عندي عومتي، عندي عماتي، كلهن بالمنطقة، قلها رايحة شوف مين عنده أكالات طبيين، رح أكل عندهن، مثلا هيدي الأشياء، بذكر إنو كمان عمتي --بالنبعة كانوا يخبزوا عالصاج، فعمتي كانت تطلع عالسطح وتكون عاملة العجين وحاطة الصاج، فأنا من بين كل العيلة كان عندي كرسي خصوصي لألي، وعندي هيدي التريحة اللي هني بيحطوا العجينة عليها وبمدوها، هي عامليني ياها خصوصي، فأنا إعزم حالي لما أعرف عمتي بدها تعمل عجين، تخبز، أنا كون ضيفة عندها من قبل بيوم، إجي نام عندها عشان لازم إطلع وأخبز، في إشبيا حلوة الواحد بيقطع فيها بالحياة، بذكر كان قبالتنا في مدرسة، وفي عجبنا --كنت أوقف عالبرندا وشوف المقبرة، وكان في كنيسة مار ضومط، حدنا، وكنت هيك بعقلاتي الصغار إطلع، دايمنا شوف إنو في دخان بيطلع من المقبرة، هي مقبرة مش للمسلمين، هي للأخوان المسيحية، فأنا كنت شوف دخان وإسأل حالي "ليه في دخان، معقولة هني بيحرقوا الواحد؟" --شوف الغرف الخشيشة، بس أنا شوف أحيانا دخان، فقول معقولة هني بيحرقون وبعدين بحطون؟، كان دايمنا هيدا السؤال يتبادر لذهن، وما كنت صرح فيه أو أسأل حدا فيه، إخجل بهيدي المواضيع، بالعطل كنا نطلع عالجل، عبيت جدي، أنا بالنسبة لألي هيدي المرحلة اللي بعشقها بعمر، وكثير بتمنى إنني إرجع إطلع على بولونيا، وبضلني قولها، إنو لو ضل يوم بعمر، أنا بدي أطلع إرجع على بولونيا، حلوة كانت الحياة كثير هونيك، كنا نروح بس يجي السيرك لهونيك، نروح، تاخذني خالتو عالسيرك، كنا نروح عالكنيسة نصوي شمعة أنا وخالاتي، ممم، رفقاتي كانوا، جدي كان يشتغل بستنجي عند ناس، ما ح إذكر إسمه يعني، هني معروفين، فكنت أنا كثير أصحاب أنا وولادهن، هني أكبر مني شوي، أصحاب، وحتى، يعني، صاحبة البيت من كثر ما كانت تحبني، ف، كانت هونيك كثير حلوة، كلها جنينات، بذكر كانت فيلا [villa]، وكان في بيت صيفي، يعني بالشتاء، هني أغلب الوقت كانوا يكونوا ببيروت أو بفرنسا، فكانوا بيت جدي هني بالبيت، فوق بهيدي الفيلا، بالطابق الأول كان هني ساكنين، والخوافة ومدامته فوق، بالصيف، كان هني بس يجوا، في بيت صيفي لجدي بنفس المكان بس بمطرح ثاني، والبيت كان عبارة عن مساحة كبيرة من الأراضي، بس هي موزعة، شي تحت، شي فوق، وفي مسبح، حوض سباحة، وعبارة عن عدة جنينات، وكل جنينة منها كان فيها أنواع كثير، قد ما بتتخالي، في فواكه، وكانوا يجيبون من برا، في إشبيا من برا يجيبها، وحتى أنواع الورود كلها يجيبها من برا، كان في جنينات للورود، جنينات للفواكه، كنت لاقى متعة إنو قطف الكرز عن الشجرة، بكل جنينة منهم كان في نوع كرز مثلا في

النوع الأسود الكبير، في النوع اللي بييجي لونه أصفر وأورونج، وإلو مشحة، في اللي بييجي لونه أحمر، فكل مطرح أنا --حس حالي مثل النحلة عم بتنتقل، باخذ من هيدي الفواكه، بذكر ورا البيت [00:05:25] كان في الأرض كان فيها التفاح الأخضر والأحمر والأصفر، وكان في السفرجل مثلا، فكان عندي الحرية إنتقل وين ما بدي، وقطف مثل ما بدي، ويعني حياة جدا حلوة، وكان عندهن كلاب، بذكر واحد منهن اسمه سيمبا، كنا كثير نحبه ويحبنا، وكنا أحيانا نغيب 3-4 أشهر، أحيانا 5 أشهر، ومجرد ما نوصل يركض دغري لعنا، يعرفنا، يقرب هيك يصير يملس حاله فينا، فكنا كثير نحبه، لهيك طلعت أنا كثير بحب الكلاب، يمكن من أثر الطفولة، عقد ما كنا نحب سيمبا نحن، نلعب بسكليت [bicycle] نحن وولاد الخواجة، ورفقاتهن كمان، يعني الجيران الباقيين، ووقت الثلج مثلا، يغطي الثلج البيت، ل فوق الشباك، نعد، كان في صويبا، كثير كنت أمبسط، تبتا تعمل كستنا، تعمل حمص مثلا، تشوي الحمص، يكون هيدا البريق تبع المي السخنة، ممم، فوت لعند [؟؟؟العشة؟؟؟] مثلا، إقعد على الحفة تبعيت المطبخ، هيك هي حفة، طاولة كبيرة من الرخام، إطلع إقعد عنده، إتسلى، نتحدث، إمبسط كنت، إطلع، في تفاصيل حلوة بتلاقيها، بتفكري فيها هلق إنو فقدتها، كنت كثير إمبسط إنو المي للشرب هي هونيك مي للشرب من الحنفية مش مثل هلق، بس إفتحها وبك تعبيها بالكبايه، بتصير تعمل ببلز [bubbles] وبتصير لونها أبيض المي، أول ما بتكون عم تنزل بتكون بيضا بيضا، بعدين بتصير تخف لتصير ترانسبارن [transparent]، فهيدي كنت كثير لاقى متعة، وكثير كنت أمبسط أنا وعم يشرب مي، ممم، شو بدي خبر عن هيدي المرحلة؟، كنا كثير نمبسط بالثلج، نمبسط كثير بالميلاد، بابا الله يرحمه كان --نحن نطلع أنا وماما وإخواتي، بابا يكون عنده شغله ببيروت، فوقت الميلاد يجي ويكون حاملنا كيس كبير كله كادويات، ممم، نحن كثير نمبسط، نقله "منين جبتهن؟"، يقول "أنا وجاي عالطريق، بابا نويل [perre noel] قلي هيدول لأولادك كادويات"، نحن كنا كثير نحبه، ليه؟، لأنو عم بيعتلنا كادويات، بذكر كادو من الكادويات هو، بتكسي فيه هيك، هي عبارة عن شي مثل هيدي، حديدة، كيف شكل كأنو جرور، بس تكسيه هي بيضة، بس تكسي هيك، بتفتح البيضة، بيطلع صوص، بيعمل صوت، هيدي من الشغلات اللي مثلا أنا ما بنساها، ممم، نمبسط بالثلج، نمبسط حتى بالصيف هونيك، الحرش كان كثير يعنيلي، أكل صنوبر الأخضر، نشوي صنوبر، نلعب بالحرش، ممم، نلحق الضفائع مثلا، وما نجرب تأذيهن، لأنو نحن بفكرنا يقولونا إنو بيدعوا عليكن، بيدعوا على أهلكن يموتوا، فنحن ما نستطعن عشان إنو -- كنت خاف من الحيايا، كنت خاف كثير من الحيايا، جدي كان من الناس اللي كثير قوي، إذا شاف حية يلقطها ويقتلها، بذكر كان عندهن كمان هيدا ال-- شو بقولوها، النعامة؟، إيه، هيدي اللي بتجي إلهما إجرين طوال، وعندها منقودها، وهي كبيرة، كان عندهن كمان، يتنقلوا بالجينة، وكان في غرفة قزاز، كلها هيدي للزراربع اللي يكون جدي عم يهجنها، أو عم يريها حتى بعدين يزرعها، كنت كثير إمبسط، فوت عليها، كنت حب كثير الغرفة، في غرفة كثير كبيرة من القمر، هيدي العصر كان جدي وأصحابي يقعدوا فيها يشربوا متة، فأنا كنت شريكتهن بالمتة، إقعد تكون كبايتي [تضحك] كمان مجهزة بالمتة، ف --إيه، ما بخبرك شو كان، وننزل نعمل بيكنيك [picnic] بالحرش اللي تحت البيت مثلا، في حرش جنب البيت، وفي حرش تحت البيت، ممم، كنت إعتل هم إذا بد-- نحن كنا نتنقل زمان بالبوسة لنوصل على بولونيا، فأنا كنت شيل هم طلعة البوسة لأنو كان كل الوقت قضيتها [00:15:25] إستفراغ من الطريق، بس مع هيك كون مبسوطة لأنو أنا رايحة عبولونيا، مرحلة كثير حلوة كانت. يعني أنا عم بحكيك هيدي القصص لحد ال8 سنين، بعدين خلص، كل هيدول الأشياء الحلوين راحوا، لأنو نحن بلش عنا، بلشت الحرب، وبلش الخوف، وبلش المرض عند بابا، بابا، غلطة حكيم يعني كانت، فكان في معاناة لإلو، بقي شهرين يتعذب بين الجامعة الأميركية وينزلوه وهيك، وحتى بذكر تفاصيل يوم اللي توفي فيه، كل شي تفاصيل صارت، يعني حتى بس إسردها للأهل، للقراب الكبار، الأكبر سنا، اللي هني العمات، وولاد عمي الكبار، لأنو في عندي وولاد عم يعني تقريبا بجيل بابا وأصغر شوي، بيتقاجنوا إنو أنا بعد بتذكر هي الأمور، بس هي الأشياء مطبوعة بوجداني وبذاكرتي، لحظات اللي بابا كان عم يتوفى فيها، ماما شو عملت، خيي كان بعده بيبي، كان عم بيكي كل الوقت ما عم يسكت ولا بشكل، ممم، والقصف كان قصف قوي، وما قادرين ينقلوا بابا، يتلفنوا للجامعة، شو بدهن يعملوا، وحرارته كانت عم تطلع، ويعطوه، وما تنزل الحرارة، وكيف توفي، وكيف ماما صارت تصرخ، وكيف العيلة كلها بكى، ونحن كمان، وكيف خيي سكت بس بابا توفي، كيف ماما عصبت عخي، مع إنه بيبي هو، ما دخله، يعني 10 أشهر عمره، 11 شهر، بس بهيدي اللحظة يمكن الوجد الكبير، ييفقد الواحد المنطق فيه، فيذكر لما كانت نقله "مبسطة؟ إنت ضليبتك تبكي تبكي، تقاويل عالبابا، هيا بابا مات، هلق إرتحت؟ سكتت؟"، هي عم تحكي مع ولد صغير، ما يفهم عليها، بس هي من وجعها، ما عم تعرف شو بدها تعمل، إيه، هيدي التفاصيل بذكرها، بذكر ماما لما إنتقلت كمان، كيف -- بذكر ماما، لما توفي بابا مثلا، نحن بالأساس لما بابا مرض، وصار في القصف وهيك، عمي طلب مننا إنو ما نضل نحن بالبيت، لأنو في مسافة شوي بيننا وبينهن، فقال إنو ياريت لو بتكونوا حدنا أحسن، لأنو أنا بابا صار متوفي، وإخواتي صغار، فنحن سكنا بالبناية دغري المجاورة لبيتها هو، بس نحن كنا بالبناية اللي --البيت لبيت خالها لماما، وبيت هو بيحي عالي، بينما بيت عمي تحت، واطي، طابق أرضي يعني، نحن كنا من البرندا نقدر نشوف الباحة الكبيرة تبعيتهن، اللي العصر وبالليل بيسهروا عليها، بذكر لما عمي، بوقتها نحن نزلنا لعنده، ممم، قعدنا عندهن يومها، يوم اللي -- هو إستشهد فيه، قعدنا على ركبته هيك، وبوسناه، وجبلنا ترمس، وهيك، هيدي اللوقشات يعني، وحكيلنا شي، ممم، قال "أنا شفت أبو هشام" --يعني بابا، "شفته اليوم إجي عندي

بالمنام"، هو صار عندهن الباحة، وهيدي البناية الكبيرة، نحن ساكنين فيها، من هيدي الميلة، من هون، يعني في بيت، بس في أكيدة سور لهيدي الباحة، ومن هون، في حيط عالي، تقريبا علو شي طابق وشوي، يكون سطح لجيران ثانيين، فقال بوقتها "أنا شفت أبو هشام، إجي من هيدا السطح، جايب معه كادو"، لأنه هو بنته كانت جايبة بوقتها بيبي صبي، وحداني يعني، أول صبي، كان عندها هي بنات، وكان أول صبي، فقال "إجي أبو هشام جايب معه هدية ومبسوط"، قلته "شو هي؟"، قلي "هيدي الهدية بتعطيها لأم زياد عشان المولود الجديد"، قلي --، إجي بده يمشي، قلته "شو، لوين؟"، قال "أنا بدي روح، يلا لحقني"، قله "يلا، هياني جاي وراك"، هيدي كان عم يسردها هو، وبعدين نحن طلعتنا، كان صار عم يصير المغيب، طلعتنا عالييت، وقتلك أنا، حركاتي شوي صبيانية كانت، فأنا كنت إلعب مع خيي الأصغر مني بالغلة، بتعرفي الغلة تانت؟، هيدي الطابة الصغيرة القزاز؟، وقد ما أنا شقية كنت شو أعمل؟

[00:20:25] حط الأجر هيدي على هيدي الأجر، يعني بصير كأنو أنا رافعة هيدا الفخذ ل فوق، وحط إيدي هيك، وإنقفا للغلة، فصيبين، تخايلي كيف يعني، مش إنو أوقف وأعملها للغلة هيك، لأ، قال إنو أنا بحرفية، بحط إجري على رحبتي هيدي، فبتصير إجري قال عالية، وبنقفا، وكان تصيب، بذكر بوقتها كان أنا وخيي عم نلعب هيك، وطلعت قذيفة قوية، طلعت قذيفة قوية، نحن دغري نزلنا بالأرض، لأنو عم تتخايلي إنت قديش نحن قريبين من هيدا القصف اللي صار؟، كان كل الجيران بالحي يجوا لعند بيت عمي، يفعدوا عندهن، لأنو هو يقولوا البيت اللي أكثر أمان، ليه؟، لأنو محاطو ببنايات، فصعبة تبقى تجي هيك، صار في دخان كثير، ممم، ركضنا نحن، دغري ماما أخذتنا، نزلتنا عبيت خالي، كانوا بالطابق ال--، نحن يمكن كنا بالثالث، أو بالرابع، ما بذكر، نزلتنا لعند بنت خالها، هي ساكنة عالطابق الأول--الثاني، وركضت هي، صاروا يقولوا إنو طببت قذيفة عند بيت عمي، ممم، عمي بوقتها هو كان ظاهر، بده يتوضى لحتى يصلي، فحامل هو الإبريق بايده، بدو يتوضى لحتى يصلي، وإين عمي ساقبت إنه عم بضهر وراه، طببت القذيفة، تعبت الشطايا بهيدي المنطقة، أسفل البطن، فتحت بطنه، إين عمي تصابو بإجريه وقتها، عمي صار يزحف، أنا هيدا المشهد ما بروح ببالي، عمي صار يزحف لوصل لحد الحيط، بده يوقف، هو وإيديه مغمسين بالدم، فكان عم يلقي عالحيط بايديه لحتى يوقف، فكانت إيديه معلمين عالحيط، واضحين، كفوف إيديه كيف الدم هيك، دغري نقلوه، بالحي عنا كان في حسينية، نقلوه لهونيك، ماما نزلت، قالولها إنو أخذه عالْحسينية، قريية دغري الحسينية، منها بعيدة، [تأخذ نفس] طلعت من الشباك، كانت صدمتها إنو شافت هيدي البطن المفتوحة، والدم كيف عم يفر، وهيك، فكان صدمة كثير كبيرة لألها، ممم، عمي توفي، للأسف، وإين عمي ضل فترة يعالجوه بالنسبة للإصابات اللي بإجريه، بعد ما صارت هيدي الحادثة وتوفي عمي --آه، أنا نسيت خبركن إنو بعد ما توفي البابا، ممم، بعد 40 يوم، قوصوا بيتنا، طب فيه رصاص بقولوه حارق؟ حارق؟ متفجر، ممم، هيدا الرصاص حرقنا غرفة النوم كلها، نحن --أكيد غرفة النوم للنتخت، وهيك إشي، والخزين، بس كان حتى في شي بقولوه "تشقيعة الفرش"، اللي هي بتجي خزانة هيك مفتوحة، وبحطوا فرش بقلبها، فرش معمولة من الصوف، محطوطة، ولحف كمان، يعني هيك إذا إجي عندك ضيوف أو حدا، بتقدي تحطيلهن ياه، لحف عشان الشتوية، البرد، فهيدي كلها إحترقت، الخزانة الكبيرة تعبت الثياب كمان كله إحترق، والمفارقة إنو كان في قنينة غاز، بنص غرفة النوم محطوطة، ماما كانت حاطيتها ومسكريتها، إحترق كل هيدا الشي، وما صار على قنينة الغاز، لا فقعت، ولا صار في شي، أوكيه، الصالون، لأنو في كوريدور [corridor] طويل، الصالون ما صار عليه شي، ما وصلت النار، بس بذكر قديش ماما كانت --عم تتخايلي تانت [tante] إنت عندك 4 ولاد، أنا عمري 8 سنين، خيي عمره 7، وخي عندي 4 سنين، وخي عندي عمره 11 شهر، وبابا توفي، وفعليا حرب، يعني ما في شغل، ما في شي، وبجي يحترقوا حتى الثياب اللي لأولادك ولألك؟، ماما راحت لهونيك، صارت بين الثياب المحروقة تطل إذا تلاقي شي ثياب لألنا، هالقد كان وجع جواتها، إنو اللي عم تقطع فيه كان كثير صعب، لقيت كم قطعة، جابتهن، وبوقتها نحن رجعتنا نقلنا على منطقة ثانية بالنبعة، ممم، خلف شارع خوري عريس، معروف هيدا الشارع، بالحي اللي قبل منه، [00:25:25] سكننا هونيك، ممم، كان بعدنا بالحرب، وقواس، ماما الله يرحمها كانت كثير قديرة، وكثير إنسانة معطانة، وكثير كريمة، بيتها مفتوح للضيافة، للعزيم، ممم، ناس كثير بتحبها، ومشهدلها، أكلها كثير طيب، وما بتزعل حدا، وبابا كان كثير كثير كمان طيب ومسال، والناس كثير كانت تحبه، وحتى تقدره، وكان كثير حنون على أهله، لدرجة غريبة، وكان هو أصغر واحد، أهله كثير كانوا معلقين فيه، ممم، ماما، بهيدي الفترة اللي نقلنا على هيدا البيت، ممم، شو كانت تعمل؟، نحن مثلا نروح عند بيت عمي زيارة، نزمط هيك بس يصير في وقف إطلاق نار شوي، مثلا نروح نطل عبيت عمي، أو يجي عمي لعنا، أكيدة حيناولنا خارجية، يعطينا شي مصاري، إين عمي إجي ظل علينا، يعطينا، تبتا إم بيبي، تجي لعنا تعطينا، فهي ماما، مشان خوفها علينا ما نزل عالطريق، تصيبننا شي رصاص أو شي، شو كانت تعمل؟، كانت تشتري، بذكر مثلا، نوع شوكولا علبة، نوع شوكولا ثاني، بيسكويت، ممم، علكة، بونبون، تشتريهن كيف كأنو عندها دكانة صغيرة، هيدي تشتريهن، لما يجي حدا من الأهل يعطينا خارجية، بتقول "حابين تشتروا شي؟"، منقلها إيه، بتقول يلا، نقوا اللي بدكن ياه، هيدي طريقة ذكية كانت، أول شي ما تخلينا نزل لتحت، وتضمن إنو نحن عم ناخذ شي هي بتعرف محتواه، ونظيف ومنيح، وثالث شي، المصاري اللي بتأخذهن، تحطلنا ياهن بالإجة، كانت كثير طريقة عندها ذكية، في عندها تدبير فيها، ماما بذكر ما كانت تنام بالليل، لأنو كانوا يوجعها ضراسها كثير، وما كانت --مرة من المرات إنجرح إصبعها،

بذكر 3 حكماء لقدروا قطعولها الدم، لأنو كان السكري كثير عالي عندها، يعني وفاة زوجها، وإحترق بيتها، مسؤولية 4 ولاد، و حرب، فكان كله هيدا، وخاصة إنو فقدت زوجها اللي بتحبه، كان كثير صعب عليها، فكيف، كيف وحدة كانت مياسة من الحياة، هيك، يعني نروح مثلا أوقات لعند عمي، نروح لعنده، مش اللي إستشهد، الثاني، ممم، تاكل مربى من عندهن، تاكل عسل، يقولونها "إم هشام، إنت عندك سكري"، نقلهن "قديه بعيش الواحد، بعيش مرة وحدة بالحياة، خليني أكل إمبسط فيهن، بكر ا جاي الموت"، هيك تفكر، فكان كثير عندها السكري عالي، الحكيم ما يقدر يعملها شي بالنسبة لأسنانها، فكنت أنا فيق عليها بالليل، فإيقة ما قدرانة تنام من الوجع، تكون عم تعن، موجوعة، إتوجع جواتي، بس أنا صغيرة، ما إقدر أعمل شي، بذكر يوم مثلا خالتي إخت إمي، اللي هي أصغر وحدة، كانت تنزل لعنا، ممم، تدرس بالمدرسة بالنبعة، وبالعطل تطلع لعند أهلها، كانت هي معنا بهيدي الوقت اللي توفى البابا فيها، صارت الحرب لأنو، ما عادت قدرت تطلع عالجبيل، وبيت جدي ما عادوا قدروا ينزلوا من بولونيا لعنا، فيغرفة القعدة هي كانت نائمة، وفي شباك عالي، طببت قذيفة بالسطح المجاور لأننا، وهي كانت نائمة تحت الشباك، ممم، إنكسر كل القزاز ونزل عليها، بس من حظها الحلو كانت مغطاية، فما إنجرحت بوقتها، كانت كمان وهلة لأننا وخوف كبير، بذكر إنو أنا كان عندي البرندا، لما جرب بدي إطلع، دغري يجي قواس على السقف تبع البرندا، بس مع هيك، أنا في شي ما كان يرددني بهيدا الموضوع، لأنو في لما بوقف عالبرندا، الطريق هيدي طويلة، وبعد منها بيحي تقاطع طريق، بالعكس يعني، وطريق كماله لهيدا الطريق اللي نحن عم نحكي عليه، كنت شوف، وهيدي بتضل بذاكرتي، [00:30:25] شوف شخص، هو مقوص بالقناص، كانت الشارع هيدا يقتصوا فيه، بالأرض، ميت، العرباية كان، هو ببيع خبز عالعرباية، فالعرباية واقعة، وواقفة هيك وقوف، والخبز واقع كله عالارض، فأنا كنت كل يوم، صبح وبعد الظهر، إزحف بالأرض، وظل راسي من بين الدرايزين لأظمن، شالوه لهيدا الشخص ولا بعد؟، وكنت شوف أنا كل يوم كيف عم ينفخ، يوم عن يوم، لدرجة إنو أنا، قديه المسافة بعيدة، لألق، مثل إنت المفروق اللي جيتي منه، لعندي، أنا عم شوف هالمسافة، هالشخص هالقدي صار عالي، هالقدي صار منفوخ، فأنا كنت كثير هيك، جواتي إنوجع، هيدا الشخص مات، ما حدا عم يقدر يشيله، وهالقدي هيك منفوخ، إنو ليه عم يصير هيك؟، وخوف إنو، خاف إنو ماما يصير عليها كمان شي، فكنا كل الوقت قلق وخوف، بذكر مرة شغلة عملتها، قد ما كنت أعتل هم الماما، راحت ماما بوقتها لعند بيت عمي، وكنا أنا وإخواتي بالبيت، فأنا حبيت إنو ريحها، إنو شيل عنها شغل، جيت، أخذت الطنجرة، كان عنا طنجرة ألنيوم، بتعرفي إنت زمان، كانوا يغلوا اللون الأبيض، يحطوله هيدا الصابون البرش، ويحطو هيدا المكعبات النيل، عشان يصير لون الثياب والشراشف لونها أبيض وزاهي حلو، فأنا فكرت قلت فرصة، ما زال ماما مش هون، خليني فاجئها، أغسلها الغسيلات، لحط أنا الطنجرة، وإقدر إحملها، حطها عالغاز، وهي كانت كبيرة، كان في صعوبة لأنو أنا صغيرة، فأنا حملتها، حطيت كرسة لأطلع، لكن على المستوى، وحطيت الطنجرة، وصرت عبي المي شوي شوي، وجبت هيدا ال tide وحطيته بقلبها، وجبت كل الثياب، أنا ما بعرف إنو في شي بينحط أبيض لوحده، وفي شي بينحط الملون لوحده، فأنا بذكر إنو حطيتها كلهن، ومن بيناتهن، ما بنسى، في بنطلون لخي صوف أحمر صغير، لخي الصغير البيبي، بيناتهن حطيته، لما بلشت المي تغلي، صار لونها زهر المي، أنا إتطلع، أنا حاطة الكرسي وعم بتطلع، وعندي هيدي العصاية اللي هني بشكوا فيه هيك الغسيل لينزل، هيك هي بتجي عصاية مثل الملقط، بس طويلة، إتطلع قول يا عمي ليه المي عم تصير لونها rose؟، ليه عم تصير حمرة؟، من بيني وبين حالي قلت يمكن هي المي بس تكون عم تغلي بتعلم هيدي ال colour، طفيت الغاز، عم بتطلع هيك، إلا لقيت الثياب كلها صارت خربانة، وقتلتك إنو أنا ماما كانت، وبابا، صار مين بمطرح معينة، الغلط ما بحبوه، الإشيا عالوقت لازم تكون معمولة، عتلت هم شو بدي أعمل بهيدي الحالة؟، صرت فضي من هيدول الميات، فضي من هيدول الميات، قمت الثياب ورحت خبيتهن بالحمام، بجاط، تحت الغراض، خبيتهن، وقمت الطنجرة، فضيتها، وحطيتها عجنب بالحمام، ولأنقذ حال، عملت حالي مريضة، ونمت بالتخت، إجت الماما حرام، شو؟، عم تحكي مع خيي هشام، وهيك، قال "مريضة وموجوعة"، بتعرفي إنو إم، وما في بي وهيك، إجت ملهوفة وخيفانة، "تقبريني شو إشبك، حبيبتي، شو صار معك؟"، قلنا "تعبانة، موجوعة"، بس طبعما ما في حرارة، المهم يمكن شي نص ساعة راحت القصة، ما بعرف شو راحت تجيب من الحمام، من حظي العثر [تضحك]، لقيت الثياب الخربانة، إجت لعندي قالتلي "إنت مريضة؟ هيدول مين عملهن هيك؟"، سكتت، حرام، بكيت، قالتلي "يا ماما، إنت ما بتعرفي إنو هيدول هني الثياب اللي باقيين عنا، هلق إنت خربتيهن"، إنو عيطت عليي، بس بمطرح دعمو عيونها، إنو أنا خربت الثياب اللي لازم نلبسها، عرفتي كيف؟، قلت "sorry يا ماما، أنا ما قصدي، قلت بدي ساعدك"، حرام، بكيت، هيدي من الإشيا اللي ما بنسأها مثلا، بذكر مرة مثلا فقت عليها، [00:35:25] وعيت بالليل، لقيتها عم ت بكر بحرقه، عم تشهق، فأنا جيت لحددها قلنا "ماما ليش عم تبكي؟"، قالتلي "حلمت فيكن، إنو أنا منت، وإنتوا حطوكن بمدرسة للأيتام، وشفتكن مكشفين، ما حدا عم يغطيكن"، هيدي الغلة مثلا ضلت مطبوعة بوجداني كل مرحلة حياتي، ويمكن هيدي السبب اللي خلاني إنو عيلتي ما إتركها، ولا بمرحلة من حياتي، رغم إنو يمكن قطعت بمصاعب وإشيا كثير بحياتي مزعجة، بس كان بالنسبة لألي هيدي الكلمة، كانت -زرعت بوجداني وضميري إنو أنا [يرن الهاتف] ممم، ف، هيدا الموقف اللي أنا عايشته، خلاني كثير عندي هيدا الإرتباط للعيلة، للأولاد، للأسرة بشكل عام، ممم، يعني هيدي تقريبا الأحداث، بذكر ماما يوم من الأيام قالوا إنو صار في صلح بين الفلسطينية، وما

بعرف إذا الكتائب أو شي هيك يعني، إنو صار في صلح. إيه، قالوا إنو صار في صلح، فكانوا الجبران بدهن ينزلوا يوزعوا حلوه، وبوقتها، بالفرح، الناس بترش رز، وما بعرف شو، ماما بوقتها كانت عم تحط ثياب بدها تغسلهن، ممم، فقالوها الجبران "إنزلي معنا إم هشام"، فقالتلهن "لأ، إنو أنا--" إيه، وماما كانت كمان، ما بنسى إنو كانت هي عم تخيطلي فستان بوقتها لألي، كانت عم تشتغل فيه، فقالتلهن "لأ، مشغولة، عندي غسيل وعم خيط فستان، فقالولها "لأ، يلا، هلق ما بتأخذ القصة، بتأخذلها شي 5 دقائق، إنزلي، إنزلي"، بوقتها بذكر قالتلي ماما "ديري بالك على ال-- إنتبهي عالغسيل، إنو ما تنزل مثلا، يظفي الغاز أو شي، وأنا هيانني جاية"، ممم، لما وافقت معهن إنو تنزل، قالتلهن "أوكيه، أنا رح إنزل، وبس إطلع حنام نومة طويلة"، هيك عملت [تمد يداها]، لأنو هي كان صايرلها يومين أو 3 أيام ما عم تقدر تنام من الوجع، فقالتلهن "أنا ح إنزل هني، وح إطلع نام نومة طوييلة" ومدتها هيك، هي وعم تضحك، فهي نزلت، ممم، بعد شوي، صار في صوت، ضجة، صريخ، وهيك، ممم، سمعت أنا الصريخ، الناس عم تصرخ، وضجة، وهيك، نحن بوقتها كنا على الطابق الثاني، فركضنا، ركضت خالتو، كانت مسطحة، ركضت خالتو، نزلت، شي قال، سمعتهن عم بقولوا "إم هشام تصاوبت"، ونحن صغار، بدي إنزل لتحت، ما كانوا يخلونا الجبران ننزل، هلق خالتو رجعت سردت الرواية بعدين، بعد ما ماما إستشهدت، كانت ماما بين الجبران النسوان والرجال اللي هني عم يحتفلوا مبسوطين إنو خلص حبروق الوضع، ما ح يعود في قواص، وهيك إشي، كان قباهن في شخص، يمكن الظاهر جاية فسدة، إنو ببي كان مقاتل، وإستشهد مع اللي عم بحاربوا أو شي، فهو قوصها من بين كل الناس، يعني إختا-- قوصها من بين كل الناس، نقاها هي، مش إنو والله قوص بطريقة عبثية، قوص الناس كلهن، لأ، لأ، هو هدف قوصها لألها، فهون صرخوا "شو عملت إنت؟! ليش هيك؟!"، يمكن هو بوقتها قال إنو "إيه، هيدي زوجها كان هيك"، بس أنا فعليا بابا كان مريض ومات من ورا غلطة حكيم، يعني، عملية كان عم يعملها، وغلط الحكيم فيها، فلما تصاوبت الماما، من الخوف، الناس بشكل طبيعي يعني هيدا الغريزة بالإنسان، إنه بحمي نفسه، كل الناس هربت، [00:40:25] طلعت، هربت عبيوتها، مين صفي مع الماما؟، خالتي، ما في حدا ثاني، وخالتي بوقتها، بذكر يمكن كان عمرها، يمكن كان عمرها شي 19، هيك شي يعني، إنو منها كبيرة بالثلاثينات أو شي، وعم تشوف إختها مصاوبة عالارض، والدم عم ينزل وهيك، "ساعدونى!" تصرخ "ساعدونى!"، ما في حدا، فهي لوين راحت؟، راحت على هيدا الطريق، قطعت الطريق يلي هو للقناص، وجابت العربية اللي كان عليها الخبز، بدها تنقل إختها، ما في لا سيارات، ولا في شي، ما كان قدامها خيار إلا إنو تضحي بحالها، وتقطع الطريق اللي فيه القناص، وما سئلت عن حالها إنو "يمكن يقوصني وأنا موت"، لأ، كان هدفها، أو همها الكبير إنو تحط إختها وتأخذها عالمستشفى، فهي راحت أخذت هيدي العربية اللي كان هيدا الزلمة، بياح الخبز، مقنص وميت، جابت العربية وإجت، بدها تحمل ماما، ماما فيها وزن، ما قدرت تحملها لوحدها، فكان وقتها في شخص، من بيت المولى، واقف، قالتله "الله يخليك، بس ساعدني لأحملها"، ماما كان بعدها لابسة، بعدها ثياب الحداد يعني، لابسة فستان أسود، بعدها حادة عالبابا، فحملها معها، حطوها عالعربية، وتخايلي جرت العربية من المنطقة هيدي لمنطقة ثانية، عم تجر ماما، وصار في قواص، وهيك، لوصلت عالمستشفى، بالمستشفى لسوء الحظ، الحكيم اللي كان هونيك موجود [تتكلم بحزن]، يعني للأسف صار في فطابع كثير كبيرة، وهيدا الكره اللي بين --اللي صار، قصة مسلم/مسيحي، وهالقصاص هيدي اللي عنجد بأسف قولها أو حتى أذكرها، هيدا الشخص، الحكيم، ممم، تعاطى بشكل جدا مسيء مع خالتي، يعني يعتنها يقلها "كلب"، "حيوان"، يقلها لخالتي، ممم، أعطى، كانت ماما بعدها عايشة، أعطاه إبرة، قتلها، روحها، أخذلها الذهب اللي كانت لابسيتهن، وإجى قلها يا خالتي "تعني يا حيوان"-- "تعني يا حيوان"، لأنو الأرمن ما ببحكوا، ببحكوا الذكر أنثى، وإنثى--، "تعني حيوان، خوذ إختك مات، يلا روح، روح"، هون تطلعت خالتي إنو "كيف إختي ماتت؟"، عطاها إبرة، وخلص عليها، وسرقلها ذهباتها، وزتها لأمي، فهي خالتي تلقائيا، شو بدها تعمل؟، دغري بعنت لبيت عمي إنو إختي إستشهدت، ماتت، إجو هني أخذوها، ونحن، نحن بعدنا عم نبيكي، وبتذكر جيراننا اللي بالطابق الأول بذكر على ميلا اليمين، كانت ست كبيرة هي، وعندها ولادها كبار، شباب وبنات، هي كانت فلسطينية مسيحية، فأخذتنا تعبطنا، و[تقلنا] "ما تبكوا، ما تخافوا، ماما منيحة"، وهيك هالحكي هيدا تحكينا، بس نحن موهولين إنو إمي ما عارفين عنها شي، فجأة بتجي خالتو عم تصرخ وبتبكي، بشوف إيديها يا تانت [tante]، لفوق، لفوق الكوع، ما في لون إيدين جلد، دم، كله لون دم، أحمر، يعني ديها مغطسين بالدم، كأنك إنت عاملة، ملونيتهن بالبانتور [painture]، إيديها لفوق دم، عم تبكي وتقول "راحت إم هشام، راحت إم هشام"، ونحن هون عرفنا إنو ماما ماتت، لياخذونا ينزلونا، نحن ما بدهن يمرقونا بالمدخل محل ماما تصاوبت، لأنو كان في كثير دم هونيك، نزلونا بذكر من عند هيدي جارتنا، حطوا السلم من البرندا، لتحت، سلم طويل، نزلونا عن البرندا، وأخذونا عند بيت عمي، رحنا لهونيك، كانت ماما بعد مش دافنيها، والكل عم يبكي، وهيك، وأنا صغيرة، وبدي شوفها من بين الإجرين، ما عم بقدر فوت لعندها، وهيك، وقتها هني قرررو إنو يدفنوها بال-- في مثل بورة، بورة اللي هي عبارة، يعني حد بيته لبيت عمي، مساحة من التراب، مساحة، هي منها جنيئة لحتى نقول جنيئة، [00:45:25] هي بورة، يعني معناها ما في زرع فيها، حفروا بوقتها، وأخذوا درفة خزانة، حطوا ماما مثل ما هي، بثيابها السود، ودفنوها، وحطوا عليها تراب، على أمل إنو إذا خلصت الحرب يقدررو يرجعوا يشيلوها ويدفنوها مثل ما لازم، بعدها نحن صار لازم نطلع من النبعة، إجي ابن عمي، وأخذنا، وقتها إنقوا، كانوا بوقتها بذكر إنو بيدفوها مثلا للسيارة، ما بعرف إذا

هني هيدول السيارات بكونوا متفقين مع الحواجز إنو مرقونا، أو هالاشيا هيدي، أنا ما بعرف صراحة فيهن، بس كان ابن عمي كثير خايف، ابن عمي كان يعني بعمر البابا أو أصغر شوي، يعين بدي قلك يمكن كان عمره شي vingthuitans إيه، هيك شي تقريبا، 27-28، ف، الصبح بكير كثير كثير، كانت السيارة ناطر بيتنا، وكنا معرضين لريسيك [risk] إنو ننحجز، ننقتل، أي حاجز ياخذنا، يقتلنا، بس كان مفروض نحن نضهر، لأنو خلص، ماما ماتت، وبابا مات، وصارت الناس عم تهرب من النبعة، ممم، والقرايب حدا عم يهرب، يعني كل واحد عم يزمط حالو، فطلعنا نحن بالسيارة، وصلنا لمنطقة المتحف، هي كان بعتمد يمكن الفاصل بين الشرقية والغربية، وأنا بنأسف قولها هيدي كمان الكلمة، بس هيدا واقعنا بلبنان كان، وصلنا لمنطقة المتحف، ما عادت تقدر السيارة تقطع أكثر من هيك، يعني حدودها للمتحف ولازم ترجع، فنحن قطعنا مسافة مشي، خالتو حاملة خبي البيبي، وخبي الصغير لاقطها هيك بجنبها، وأنا وخبي لاقطين إيد بعض كمان ولاقطينها، معرطين فيها، خيفانين، من المواقف اللي أنا ما بنسأها بوقتها، كان في شخص عنده عرباية صغيرة، عرباية كثير صغيرة، منها كبيرة، يعني تقريبا قد هيدي الطاولة، عاملها مثل قزاز من فوق، كأنو خزانة قزاز، هو كان يبيع مناقيش زعتر وهيك إشي، فقال شافنا، شاف كيف وضعنا جايين وهيك، والخوف "إنتوا منين جايين؟" [يسأل]، قالتله خالتو "نحن هربانين من النبعة"، قال "إنت إمهن؟"، قالتله "لأ، إختي إستشهدت، وبيهن مات، أنا خالتهن"، فالثي ما بنسأه إنو هو، رغم إنو، تانت [tante] بتفكري إنو "قديش هيدا الإنسان غني النفس"، مش مهم الإنسان يكون معه كثير مصاري، ويفضل عالعاليم بالمصاري تبعيته، لأ، إذا كان فقير وعم يعطي، هيدا الغني الحقيقي، طب هيدا إنت الإنسان اللي عم يبيع مناقيش ليعيل عيلته على هيدي العرباية الصغيرة، يعني قديه هو بكون عم يطلع بالنهار؟، قديه حتأثر عليه لما بده يعطي لكل واحد مننا منقوشة ولخالته منقوشة مثلا؟، راح نهاره أكيدة، ربحه كله راح، بذكر وما بنسى إنو [كلب يعوي في الخلفية] [ينقطع التسجيل ويواصل] فهيدا الشخص عقدر ما تعاطف معنا، بذكر منقوشته اللي عملنا يها، كانت منقوشة كبيرة لكل واحد مننا نحن، نحن الصغار، بذكر بالتفاصيل شو حططنا فيها، حط البندورة والخيار والنعن، ولفنا ياهن، ولفهن بورقة بيضا، مش جرايد، ورقة بيضا، وعطانا لكل واحد مننا، وفوق هيدا وكله، لأ عمل شي أكثر بكثير من هيك، راح وإشترى لكل ولد مننا نحن لعبة، يعني تتخالي إنت إنو هيدا الإنسان --أنا كنت بتمنى، يعني عمري 8 سنين، ما بعرف أكيدة أتصرف، كنت بتمنى لو أنا مثلا بعرف إسمه عالقيلة لدور عليه أشكره، أو أعرف حتى ولاده مثلا، رد هيدا الجميل لأهن، للأسف ما بعرفه يعني، وهو ما كان صغير، يعني هو كان كبير، يمكن رجل خمسيني أو أكثر شوي يمكن كمان، بالمبدأ ما بعتمد إنو --لأ، هو منو عايش أكيد هلق لأنو هو أصلا بالأساس كان كثير كبير يعني، بس هيدا موقف ما بنسأه بحياتي، وإنشالله يا رب، الله سبحانه وتعالى، بيعطيه بالأخرة وبكافيه على هيدا العمل، بعدها نحن إنتقلنا، [00:50:25] رحنا، ممم، عندي بنت عمي كانت مستأجرة، هي مزوجة، بنت عمي اللي قلتك إنو بابا إجي بالمنام وجاييلها هدية لأبنها، كانت صارت سكنت، إستأجرت بالحمراء، بذكر إنو نحن رحنا لعنا، وفاتوا حممونا وهيك، وجدي كان بالوقت اللي بابا توفي فيه، جدي كان بذكر بوقتها رايح يمكن عالحج أو شي، يعني فعليا بابا لما توفي، جدي ما كان موجود، بيو، ممم، لما رجع، نحن كنا صرنا، ممم، طبعنا العيلة طلعت، ونحن ما عنا حدا هون، يعني ما عنا بيوت بالغربية أو بالجانب، بس كان عندي عمه من العمات، كانت مزوجة من زمان بالجانب، فتلقائيا بذك تشوفي حدا من عيلتك بمطرح يقدر يدبرلك بيوت للأجارات للعيلة، للأهل وهيك، فأغلب العيلة اللي عنا طلعت عالجانب، وإستأجروا بيوت، تينا كانت موجودة، جدي كان بعده مش جاي، جدي لما وصل كثير كانت صدمة لألو لما عرف إنو ببي توفي، وإمي إستشهدت، صدمة كانت لألو، هو رجال كبير، المهم وقتها نحن، شيخ الضيعة الكبير كان عنده بيت [تأخذ نفس]، قدم لبيت جدي هيدا البيت، وهو عبارة عن غرفة كبيرة وكوريدور وحمام، هيدا هو، بتضهري منه في باحة كبيرة، وبعد منها بتضهري في حمام عجنب، إيه، وفي حدنا كان، يعني، هيدا درج بوصلك ع هيدي الشقة، هيدي الصغيرة، بس في غرفة ملاصقة لهيدا البيت، ملاصقة لأله، بذكر كانت زوجته الأولى، كانت كبيرة كثير بالعمر، وكانت مضيعة، يعني هي منها واعية، يمكن عندها زهايمر، فهي ما بتعرف شي، كل الوقت كانت تضلها هيك تصرخ وتعيط وهيك، وكنا حطونا--

ي.أ.: بأي منطقة هيدا؟ بأي منطقة؟

ج.د.: [00:54:19] بالجانب، إيه، نحن طلعنا عالجانب، وهيدا شيخ الضيعة أعطانا نحن لألنا، لبيت جدي لأنو عرف إنو -- جدي كان قبل هيك، يعني لما كانوا بلفلسطين، وطلعوا من فلسطين، إنتقلوا من ضيع ضيع، ووصلوا وسكنوا فترة لهيك بتلاقي إنو عمتي تزوجت من --، لما حطوا رحالهن، وقعدوا، هي تزوجت، بعد هيك، رجعوا هني إنتقلوا لبيروت عالنبعة، ما بقياوا كل الوقت بالجانب، فجدي كان معروف من القبضايات، يعني جدي كان من الناس اللي يمكن بعقلك هلق إنت تانت [tante]، بعقلك وفكرك، تفكرتي إنو هيدول الجيل القديم في مبالغة بالأحداث تبعيتهن بالقوة تبعيتهن، بس هي فعليا معروفة، في شخص، ممم، في شخص كان من القبضايات وكان يقلب بأيده ال، الفدان، بتعرفي تانت [tante]، زمان كانوا يفلحوا بيقرتين، وكان في مثل ما بعرف شو، ما بذكر لأن مش عايشة كنت هونيك، ما بعرف إذا في لإلها بكون حبال أو شي، وفي شي مثل شي حديد،

سكة حديد أو شي، بتغرز هي بأرضن بيمشوا البقرات، بتصير تفلحطن هيدي الأرض، هيذا الرجال اللي كان هونيك معروف من القبضيات، ما حدا يقدر إنو يوصل لقوته، كان يقلب هيذا الفدان بايده، فكان معروف على مستوى هونيك الجنوب، إنه من القبضيات، لما إجي جدي، كان واصل صيته إنه هو من القبضيات كمان، فكان في مثل مبارزة، إنو مين الأقوى، ليثبت وجوده أكثر، وإجي قلب الفدان بايده، جدي ضحك، جدي بأجره قلب الفدان، [00:55:19] بأصابع إجره قلب الفدان، هون كانت صدمة كبيرة لألو، لهيدا الشخص، بس إحترم كثير جدي، لأنو جدي كان من الناس اللي كثير كثير محبوب وأخلاقه عالية، رغم إنه هو كثير قوي، بس هو ما بيستعمل هيدي القوة بشي مسيء، عمتي اللي هي تزوجت هونيك، كانوا يقولوا عن شي اسمه العمدة، اللي هي عبارة عن شي، جرن كبير، حجر كبير، ما يعرف شو هيذا، القبضيات، بتحملة، بتشيله، فمعروفة، الرجال بتتبارز، مين القبضاي، بيحملة لهيدا، عمتي شافت هيك، ضحكت، بتعرفي شو عملت؟، قالتلن "زيحوا!!"، زاحت الرجال، كمشتها وحملتها، إطلعوا هني إنو "شو عم يصير؟!"، إنو في شي مش طبيعي، عرفتي كيف؟، هالقدتي كانت بنيتها قوية، يعني، ببو لجدي وعمه، كانوا معروفين قديه هني قبضيات، لدرجة بفلسطين، هلق، نحن فينا ما نذكر المناطق اللي عم يذكرها أنا هيدي الجداد، يعني مثلا مثل منطقة يعني فينا نقول جنوب، وفلسطين؟، فينا نقول هيك، ولا حكما لازم نقولهن؟ أوكيه، واحد منهن مثلا، الليرة الإنكليزية كان إذا عملها هيك [تنمذج الحركة بيديها]، يمسح الكتابة تبعيتها، وهيدي معروفة، واحد منهن، كانوا يركضوا الثور، والقبضيات لازم يوقفوا هيذا الثور، إذا هني قبضيات، لازم يقدر يوصل للثور ويوقفه، فهيدا خيه --عمه لجدي، يذكر بحاتة يقولوا إنو ركض الثور، وصارت تركض الهيديول القبضيات، فهو لقط الثور بالقرن تبعوله، ضل مكفي الثور، فقالوله، صاروا يضحكوا "بي [؟؟؟ياسر؟؟؟] ما قدرت تعمل شي"، وما بعرف شو، عطاهن القرن تبعوله، [deja؟؟؟] سلخ القرن تبع الثور، هالقد كان بنيتها كثير قوابة، بس ما حدا من عمومي طلع عنده هيدي المقدر القوية مثل جدي وببي جدي وعمي. ممم، سكنا تانت [tante] نحن بالجنوب، وخطونا بمدرسة، المدرسة اللي خطونا فيها، رحنا عليها تانت [tante]، بس كانت تانت [tante] بالفرنسي، ونحن كنا عم ندرس إنكليزي، فنحن ما كنا فعليا نفهم عليهم، وأوقات يعصب الأستاذ علينا، ويعاقبنا، يجي يضرب بطرف المسطرة، ما بعرف إذا عايمكن كانت موجودة، مسطرة الخشب هيدي اللي هيك، كان أوقات يوقفها هيك، ويضرب للولد، أو يجيب تانت [tante] القلم، ويحطه هيك، ويفتله، فتحسي بوجع مؤلم بأصابعك، المهم، فبالنسبة لأنا كانت القصة عبثية، إنو نحن ما كثير عم نستفيد من الموضوع، بس الشئ اللي كان دائما يقفني ويخوفني، إنو أنا إجي مشي من المدرسة عالبيت، بالمنطقة اللي نحن بيت جدي كانوا ساكنين، في بيدر بيقولوله، بيدر هو كانوا من زمان بيستلوه لحصاد القمح، وهي بتكون مساحة كبيرة مفتوحة، كنت أنا بس أوصل عالمفرق، كمان بدي فلك، المسافة مثل كيف؟ أبعد شوي من المفرق اللي إنت جيتي لهون، أنا صير حواسي كلها مركزيتها، ومفوكسة [focused on] على البيت اللي بيت جدي ساكنين فيه، ودينتي عم صنها كل الوقت، خيفانة إسمع صوت صريخ إنو جدي وسني ماتوا، كان هالقد عندي رعب، كل يوم هيدي المعاناة كنت عيشها، أنا وراجعة من المدرسة ضلني خيفانة إنو أنا أوصل عالبيت ولاقي جدي أو سني متوفيين، لأنو هني أصلا كانوا كبار بالعمر، إفقد بعد ناس بحبهن، فكنت كثير عاني بالنسبة لهيدا الموضوع، وكثير خاف، وكنت كمان بعدي شقية، الشباك تبع غرفة ال-- هيدي الغرفة اللي هي كانت غرفة معي، يعني تقدي فيها وتنامي فيها، كان شبك إلو قضبان حديد هيك، بس كان يفوت راسي منه، فأنا شو أعمل؟ [01:00:19]، أحيانا، ممم، هيك، يجي ببالي ما بدي فوت من المدخل، فوت راسي، وفوت عالبيت من الشباك، أو فوت راسي وإضهر من الشباك، بقيت عندي هيدي [تضحك] هيدي الخصلة الل-- جئمة كنت، إيه، ممم، بس ما طولوا إخوانتي، أخذوهن على مدرسة للأيتام، بقيت أنا تقريبا شي شهرين ثلاثة، وبعدين رجعت إلتحقت فيهن، إلتحقت فيهن على مدرسة للأيتام، بيحي بكل شقة في مشرفة، وهي مثل إم بديلة للأولاد، بتهم فيهن بحياتهن اليومية كاملة، اللي هي بدها تفيقهن الصبح، تساعدن يلبسوا، يغسلوا، يفرشوا أسنانهن، تنزل هي وياهن عالمطعم، ليتروقوا، ليطلعوا، لتجهزهن للمدرسة مثلا، منرجع لنوصل عالبيت لفوق، مثل كانوا إم لأنا هي، هي مسؤولة عنا بكل تفاصيل حياتنا، لوقت ما ننام، وتنام هي، وهيدي القصص كلها، من الإشي اللي بذكرها أول ما وصلت لهونيك، الصبية كانت هي، منها كبيرة، صبية كانت، يمكن عمرها شي 19 اللي كانت مسؤولة عنا، سألتني سؤال، قالتلي "إنت شو بتحبي تعيطيلي؟ بتحبي تعيطيلي ماما، ولا بتحبي تعيطيلي أخت، ولا بتحبي تعيطيلي خالتي؟"، كانت عم تخبرني لكون أنا مرتاحة شو بدي، صفتت أنا لأول وهلة وتطلعت، إنو أنا ما رح إقدر قلها ماما لأنو ما في حدا بجل محل إمي، وكلمة أخت شوي حسيتها ثقيلة، ما كثير إستسعتها، لقيت أحلى شي قول خالتي، فقلت "أنا بعيطلك خالتي"، قالتلي "أوكيه"، فهي كانت تشرف علينا وتهتم فينا، خيي الصغير، نسيت خبرك، لما كنا نحن بالجنوب، ممم، طبعا صاروا بيت جدي، أهل إمي، واللي هني كثير معلقين فينا، صاروا بدهن ياخذوني، يطلعونني لعيش معهن، هني حياخذوا خيي الصغير، البيبي، ليعيشوه عندهن، كان جدي وتيتا، وخالتي اللي كانت عايشة، اللي طلعتنا من بيتنا وقت الحرب، من الذبعة، أهليت بيبي قبلوا إنو ياخذوا بيت جدي أهل إمي خيي الصغير يربوه، بس ما قبلوا إنو أنا إطلع كمان، وكانت هيدي بالنسبة لجدي كثير صعبة، لأنو كان كثير معلق فيي، وكان يشوفني أنا بنته، يعني كل ما ظل، يقلي أنا عم شوف--، يعني، يذكر إسمها للماما، ويقول "أنا عم شوفها قدامي"، يعني كيف أنا كانوا أنا صرت هيدي الروح، روح إمي اللي عم يشوفها، فصار بيكي مثل الولد الصغير، إنو "ما تحرموني من هيدي الشغلة"، قالوله

"أ، أحسن تضلها مع إخوانها"، وهيك، فالمهم، أخذوا خبي الصغير، فضلت أنا وإخواني التين الصبيان، وقتلك راحوا هني عالمدرسة، وبعدين أنا إنتحت فيهن، ممم، بالمدرسة، ممم، في نظام، في نظام قوي، وخالتو كانت مربية الله بوجهها الخير، ما منسى فضلها أبدا، ومنحبها كثير، ولهلق نحن علاقتنا كثير حلوة، وعلى طول، على طول إتصالات بيننا وبينها، وهي بتنزل بتزورنا، بتعتبرنا أولادها، هي ما تزوجت، ونحن منعتبرها مثل إمنا، هالقددي يعني نحن، كثير كلوز [close] لألها، كانت كثير حريصة علينا، كثير تخاف إنو نعمل غلط، كثير كثير شديدة كانت معنا، كثير تحب إنو نحن نكون أحسن ولاد، وأشطر ولاد، وأنصف ولاد، ومن كل النواحي، ممم، وحتى بثيابنا تتدخل، يعني بمراحل معينة، بعد ما نحن كبرنا، ورحنا بعد فترة، رجعنا رحنا على، مثل ما خبرتك، إنتقلنا وقت الإجتياح لسوريا، هيدي مرحلة لاحقة بدي إحكي فيها، فهي كانت كثير إنسانة نظامية وشديدة بهيدي المواضيع، وبالإشيا الكثير شديدة فيها قصص خزائن الثياب، الخزانة عنا كان ممنوع تكون التيشيرت [T-shirt] زايحة عن الثانية، مثل كيف بتقوتي عالمحلات، [01:05:19] يكونوا كثير هيك الثياب، بتلاقيهن ما في شي زايح عن بعضه؟، نحن خزائنا كانت هيك يا تانت [tante] إذا شافت التيشيرت [T-shirt] زايحة شوي عن الثانية، تكمش الأغراض كلهن، تحطهن، وتقلنا "إرجعوا رتبوهن من أول وجديد"، نحن كنا ماشيين مثل الساعة، ما نسترجي نلكك، مثل ما بقولوا، ممم، من الإشيا اللي عملتها، إنو أنا رحت، لما وصلت عالمدرسة، كان صار قاطع نص السنة، كان صار نص سنة دراسية رايحة علي، ف، وبدها تحطنا نحن المدرسة، كل الطلاب بالأنزوا كانوا يدرسوا، يروحوا عالأنزوا، فهي لما راحت عالإدارة لتسجلني، قالوها "بدنا ننزلها صف، نحطها ثالث إبتدائي"، هي كان عندها رفض شديد، قالتلن "أ، أنا ما بحط بنتي بالثالث، أنا بحطها بالرابع"، قالوها "بس نص المنهاج رايح عليها، وما رح تنجح"، قالتلن "أنا مستعدة أخذ هيدا الريبسك [risk] وأنا بقبل، حتى لو سقطت، بس أنا بدي ياها بالرابع، أنا ما بدي نزلها صف"، فهي كان عندها، بالنسبة لألها هيدا هدف، عم تحارب كرماله، فأنا بذكر أول شهر طلعت بمكن مرتبتي شي 12، هي كانت تدرينا بالبيت، ونحن كنا ناخذ دروس إضافي بعد الظهر بالمدرسة، يعني نحن بس نرجع عالمدرسة من برا، على المدرسة الداخلي، نحن نطلع نغسل ونتغذى، وفي عنا كان قبولة بعد الظهر، هيدي إلزامي نحن لازم نعملها، ننام، بعد منها كان ننزل، يدق الجرس، ننزل على، كان في صفوف بالطابق الأرضي الأول، صفوف للدراس الإضافي، يعني جابيلنا أساتذة لحتى يتابعونا بالنسبة للفرص اللي عنا، إذا في إشيا مننا فاهمينها، كانوا كمان يعملوا هيدي الإشيا، هي كانت معلمة لألي بالصف اللي أنا فيه، بس أنا كنت كثير خاف منها، يعني أنا بالمدرسة أنا منطلقة، ماخذة راحتي، باخذ علامات كثير منيحة، بس أنا كنت عندها كنت كثير خاف منها، لدرجة وقت تقلي "طلعي حلي هيدا"، أعمل بلوك [block]، صير مثل حبة البندورة حمرا من الخوف، وصير إرجف وخاف إنو--، فكانت بأوقات تقلي "أنا بدي أعرف إنت كيف عم تجيبي علامات منيحة؟ عم تغشي إنت يا خالتي؟"، شو أنا قلها "لا، والله يا خالتو، أنا والله ما عم غش"، "طب ليش إنت ما عم تعرفي تجاوبي هون؟"، شو بدي قلها؟، بدي قلها خيفانة منك؟، فتانت [tante] أنا ال، ممم، آخر السنة بوقتها، ما بنسى، آخر السنة بوزعوا هدايا للمتفوقين، وللأوائل، المرتبته الأول والثاني والثالث، بصفوا كل التلاميذ بالمعب، وبيعطوا هدايا للي مرتبته أولى وثانية وثالث، أنا كنت الوحيدة، الحالة الإستثنائية اللي إنعطالي هدية مثل الأوائل، لأنو أنا جيت مرتبة الخامس، أو السادس، كان بالنسبة لألهن في إنجاز، لأنو أنا نص سنة مني دارسة، وإجي النص الثاني أوصل لمرتبة الخامس، فكان بالنسبة إلهن إنجاز كثير كبير، الطلاب إنو "ليه عم تعطوها لألها، طلعت مرتبتها خامس، ليه عم تعطوها؟" قال "لأنو هي بتستاها، لأنو هي بتستحقها بجدارة"، بذكر من قلب الهدايا هيدول كان في مسطرة، في كان دفتر رسم، في محاية، هيدي الإشيا هيك، التشجيعية يلي عطونا ياها، كانت فرحة ما بتنوصف لخالتي، يمكن أنا بقدرها، أو بحسها نفس الفرحة بتعيتي لما ولادي كانوا عم ينجحوا وعم يخرجوا، وعم يعملولهن هيدا الإحتفال، وعم يعطوهن شهادة، هي الفرحة لما تكوني إنت عم تضحكي وعم تيكي، قديه بتكوني إنت فخره بولدك، إنو بمطرح معين، نجاحه هو مش بس نجاح لألو، هو نجاح لألك إنت كإنسانة، إنك إنت عم تنجخي من خلاله، عرفتي؟، هي كانت فرحتها ما بتنوصف، إنو أنا قدرت إنو أوصل هيك، ممم، كفيت الدراسة عادي، وكانت هي تشتغل عشي تانت [tante] [01:10:19]، نحن كنا بالغرفة، نحن فعليا كنا شقة، عبارة عن غرفتين، وكوريديور، وحمام خاص لأننا، بس نحن، نحن 3 إيه، نحن 3، وهي الغرفة بتساع أكثر، والغرفة الثانية كمان فيها تخوت أكثر، فنحن كنا بذكر مع عيلتين تانيين، يعني صبي وبنث ثانية، وإجت عيلة كانوا ساكنين بالسعودية وأوضاع بيهن منيحة، بس إمهن إنقتلت عن طريق الخطأ بعرس، رصاصة هيك، راحت، ماتت يعني، بالغلط، وبيهن كان عنده، بيغسل كلي، فإضطر يحط الأولاد بالمدرسة، هني كانوا 3 صبيان وبنث، بس الصبي الصغير كان عمره بالأشهر، يعني كان عمره، يمكن، بعتمد يمكن عمره، أو يمكن شي سنة تقريبا، يعني خالتو كانت مسؤولة، كيف بتعرفي الأم لما بتنصف الولد بالليل وهيك، هي اللي--

ي.أ.: كانت هي بهيدا البيت اللي فيه إنتوا كلكن؟

ج.د.: [01:11:32] إيه، يعني هي أنا بذكر تختها حد تختي أنا، هي هون تختها، أنا تختي، وبعدين إخوانتي، وبعدين في، ممم، أه، لأ، صوري [sorry]، نحن كنا 4 عيل، لأنو في عنا كمان، في كان شب أكبر مني، وخيه أصغر مني، وفي هيدول الولدين، بنت وصبي، وفي هيدول ال3 صبيان وبنت، بس هني كانوا ورا، فنحن هيدول كانوا بالنسبة لأننا إخواننا، مش حدا غريب، لأنو نحن عم نعيش معهن كل تفاصيل حياتنا، من الصبح لوقت ما ننام، الشي الحلو اللي بذكره بهيدا الموضوع إنو كان يوم الجمعة، كانت يجوا أهل الطلاب، قرابيه لل-- مثلا قرابيي أنا، مثلا عمي، أو تيتا وجدو يجوا من الجبل، خالتو من الجبل تجي، يكونوا بتعرفي، جاييلنا فواكه، حلو، إشي طيبة هيك، ف، الحلو فيها كانت ما تعمل إنو نحن والله هيدول لأننا، نحن لازم ناكلهن والباقي لأ، كانت بتشتغل على قصة العيلة، إنو يكون في هيدا الترابط، نحن كلنا إخوة، فلما كان حدا يجي من أهل حدا مننا نحن الأربع عيل، يجيب شي، كانت تقلنا "إفتحوا وإعدوا كلكن وكلوا مع بعض، إنو إنتوا إخوة، لازم تتشاركوا بهيدا الشي الطيب"، فكنا معودين حتى بهيدا الإشي اللي جابوها أهلنا، نقعد كلنا سوا وناكلهن مع بعض، وهيدا الشي الكثير حلو، واللي بتذكره كثير منيح، ممم، أكيدة كان عنا [ينقطع التسجيل]

[نهاية المقابلة]